



Sesida dals

Communitgà ils

Protocol nr.

10 da zercladur 2024

12 da zercladur 2024

497/2024

Incumbensa Dürler

concernent l'augment da l'indemnisaziun da la Banca chantunala grischuna (BCG) al chantun

Resposta da la Regenza

En sia resposta a la dumonda Dürler concernent la garanzia chantunala dal Grischun a la Banca chantunala grischuna (BCG), autezza da l'indemnisaziun, en la sessiun da favrer 2024, è la Regenza gia s'exprimida detagliadamain davart il tema (PCG 4/2023–2024, p. 628 s.). En spezial ha ella constatà, che la garanzia chantunala haja in caracter sumegliant ad in'assicuranza e che l'autezza da l'indemnisaziun stoppia perquai s'orientar a la ristga. Quai correspundia a la regulaziun actuala en la Lescha davart la Banca chantunala grischuna (LBCG; DG 938.200). Tenor l'artitgel 5a LBCG dependa l'autezza da l'indemnisaziun dals agens meds ch'èn necessariis tenor las prescripziuns da la lescha davart las bancas. L'autezza dals agens meds vegn determinada decisivamain da las ristgas che la banca ha surpiglià.

La Regenza ha decidì gia ils 9 d'avrigl 2024 d'elavurar ina survista cumplessiva da las basas da la BCG. Latiers tutga en spezial la LBCG che regla tranter auter l'autezza e las modalitads da l'indemnisaziun da la garanzia chantunala. Ella na vul dentant betg anticipar il resultat da l'analisa cumplessiva da la situaziun. La garanzia chantunala è mo in aspect che na po e na duai betg vegnir tractà separadamain. I dovra ina valitaziun conscienziosa da tut las schanzas e da tut las ristgas en il senn d'ina consideraziun cumplessiva davart la BCG per suttametter al Cussegl grond, sche necessari, ina proposta equilibrada ed actuala per la regulaziun futura da l'indemnisaziun da la garanzia chantunala. Igl è planisà, che la Regenza prendia enconuschientscha da l'analisa da la situaziun fin mez 2025 e ch'ella concludia suenter l'ulteriur proceder, er concernent la garanzia chantunala.

Sa basond sin questas explicaziuns propona la Regenza al Cussegl grond da midar questa incumbensa sco suonda:

La Regenza vegn incumbensada d'examinar, en il rom da l'analisa da la situaziun currenta davart la BCG, in augment da l'indemnisaziun da la garanzia chantunala en il senn da questa incumbensa sco er ulteriuras variantas d'adattaziun e, sche neces-sari, da suttametter al Cussegl grond ina midada da la Lescha davart la Banca chan-tunala grischuna (DG 938.200).



En num da la Regenza

Il president:

A handwritten signature in black ink, appearing to be 'J. Parolini', written over a faint circular stamp.

Dr. Jon Domenic Parolini

Il chancelier:

A handwritten signature in black ink, appearing to be 'D. Spadin', written over a faint circular stamp.

Daniel Spadin